



Icyegeranyo cy'amakuru y'imikino yaranze icyumweru

2023

Taliki 16– 21 Ugushyingo



P.1 Volleyball : Police VC na Pipeline VC zegukanye irushanwa ry'Akarere ka 5

Ijambo ry'ibanze

Komite Olempike y'u Rwanda yashyizeho iki cyegeranyo mu rwego rwo kurushaho kumenyekanisha ibikorwa byayo n'iby'abanyamuryango bayo (Amashyirahamwe y'Imikino mu Rwanda) hagamijwe gukomeza guteza imbere siporo no kuyikundisha Abanyarwanda muri rusange by'umwihariko abakiri bato.

Iki cyegeranyo gikubiyemo amakuru n'ibikorwa bya siporo byaranze icyumweru, kikazajya gisohoka rimwe mu cyumweru.

Ntigitimbura kandi izindi nzira Komite Olempike y'u Rwanda isanzwe ikoresha mu kugeza amakuru ku banyamuryango bayo n'abanyarwanda muri rusange.

Ibirimo

- P1 **Volleyball** : Police VC na Pipeline VC zegukanye irushanwa ry'Akarere ka 5
- P2 **Cricket** : Challengers yegukanye irushanwa "Dafabet RCA 50 Overs Premier League 2023"
- P2 **Football** : Ikipe y'u Rwanda yatsinze Afurika y'Epfo mu gushaka itike y'igikombe cy'Isi 2026
- 3 **Handball** : Ikipe y'u Rwanda igiye kwitabira imikino y'Afurika bwa mbere
- 3 **Nyagatare**: Hatangijwe umwaka w'imikino mu mashuri
- 4 **Sitting Volleyball** : u Rwanda ku mwanya wa 7 mu bagore n'uwa 9 mu bagabo mu gikombe cy'Isi 2023

Taliki 14 kugeza 19 Ugushyingo 2023 muri BK Arena habereye irushanwa mpuzamahanga mu mukino wa Volleyball ryahuje amakipe yo mu Karere ka 5 mu bagore n'abagabo "CAVB Zone 5 Club Volleyball Championship 2023".

Iri rushanwa ryari ribaye ku nshuro ya kabiri ryari ryateguwe n'ubuyobozi bw'Akarere ka 5 "CAVB Zone 5" ku bufatanye n'ishyirahamwe ry'umukino wa Volleyball mu Rwanda "FRVB" na Minisiteri ya Siporo "MINISPORTS" ryitabiriwe n'amakipe 11 harimo 6 mu bagabo n'andi 5 mu bagore yari yaturutse mu bihugu 4 birimo u Rwanda, u Burundi, Uganda na Kenya.

Mu bagabo hari hitabiriye amakipe 6 aho yari yashyizwe mu matsinda abiri, itsinda A ryari rigizwe na REG VC, APR VC (Rwanda) na Amical VC (Burundi) naho itsinda B rigizwe na Police VC, Kepler VC (Rwanda) na Sport-S VC (Uganda).

Ikipe ya Police VC ni yo yegukanye igikombe itsinze ku mukino wa nyuma ikipe ya Sport-S VC yo muri Uganda amaseti 3-1 (20-25, 25-14, 25-21 na 25-17) naho ikipe ya APR VC yegukana umwanya wa 3 itsinze Kepler VC amaseti 3-2 (25-21, 25-18, 28-30, 23-25 na 15-12).

Police VC yahawe igikombe n'ibihumbi 3 by'Amadorali y'Amerika, Sport-S VC ihabwa ibihumbi 2 naho APR VC ihabwa 1000.

Uko amakipe yakurikiranye

Ikipe ya Police VC yegukanye umwanya wa mbere ikurikirwa na Sport-S VC (2), APR VC (3), Kepler VC (4), REG VC (5) na Amical VC (6).

Mu bagore hitabiriye amakipe 5 ari yo APR VC, Police VC, RRA VC (Rwanda), KCCA VC (Uganda) na Pipeline VC (Kenya).

Aya makipe yakinye hagati yayo maze ikipe yasoje iri ku mwanya wa mbere ari yo Pipeline VC ikina na RRA VC yasoreje ku mwanya wa kabiri mu guhatanira igikombe.

Iyi kipe ya Pipeline VC yatsinze RRA VC amaseti 3-0 (25-20, 25-23 na 25-19) naho ikipe ya APR VC yegukana umwanya wa 3 itsinze Police VC amaseti 3-1 (26-24, 25-21, 21-25 na 25-21).

Ikipe ya Pipeline VC yahawe igikombe n'ibihumbi 3 by'Amadorali y'Amerika, RRA VC ihabwa ibihumbi 2 naho APR VC ihabwa 1000.

Uko amakipe yakurikiranye

Pipeline VC (1), RRA VC (2), APR VC (3), Police VC (4) na KCCA VC (5).

Iri rushanwa ryehereye kuba muri 2019 ariko mu cyiciro cy'abagabo gusa ndetse rikaba nabwo ryari ryabereye mu Rwanda. Ikipe ya Gisagara VC ni yo yari yegukanye igikombe.



Cricket : Challengers yegukanye irushawa "Dafabet RCA 50 Overs Premier League 2023"

Taliki 19 Ugushyingo 2023 ni bwo hasojwe irushanwa "Dafabet RCA 50 Overs Premier League 2023" ryari ryitabiriwe n'amakipe 6 asanzwe akina shampiyona y'icyiciro cya mbere mu Rwanda mu mukino wa Cricket.

Aya makipe uko ari 6 (Challengers CC, IPRC Kigali CC, Zonic Tiger CC, Right Guard CC, Telugu Royals CC na Kigali CC) yakinye hagati yayo maze ikipe ya Challengers CC isoreza ku mwanya wa mbere n'amanota 10 aho yatsinze imikino yayo yose. Ku mwanya wa kabiri haje ikipe ya IPRC Kigali CC n'amanota 8, ku mwanya wa 3 haje Right Guard CC n'amanota 5 ikurikirwa na Zonic Tiger CC n'amanota 4, Telugu Royals CC isoreza ku mwanya wa 5 n'amanota 2 naho ikipe ya Kigali CC isoreza ku mwanya wa nyuma wa 5 n'nota 1.

Ikipe ya Challengers CC yahawe igikombe na Miliyoni 2 z'amafaranga y'u Rwanda naho ikipe ya IPRC Kigali yabaya iya kabiri ihabwa miliyoni 1.



Football : ikipe y'u Rwanda yatsinze Afurika y'Epfo mu gushaka itike y'igikombe cy'Isi 2026

Taliki 21 Ugushyingo 2023, ikipe y'u Rwanda "Amavubi" yitwaye neza itsinda Afurika y'Epfo mu mukino w'umunsi wa kabiri mu gushaka itike y'igikombe cy'Isi 2026 kizabera muri Canada, Mexico na USA.

Uyu mukino wabereye kuri Sitade Huye, ikipe y'u Rwanda yatsinze Afurika y'Epfo ibitego 2-0 byatsinzwe na Nshuti Innocent na Mugisha Gilbert.

Iyi kipe y'u Rwanda mu mukino w'umunsi wa mbere wabaye taliki 15 Ugushyingo 2023 yari yitwaye neza inganya na Zimbabwe 0-0. Iyi kipe y'u Rwanda "Amavubi" iri mu itsinda hamwe na Nigeria, Benin, Zimbabwe, Afurika y'Epfo na Lesotho.

Nyuma y'imikino y'umunsi wa kabiri, ikipe y'u Rwanda iyoboye urutonde n'amanota 4 ikurikiwe na Afurika y'Epfo n'amanota 3, Nigeria, Lesotho, Zimbabwe n'amanota 2 naho ku mwanya wa nyuma wa 6 hari Benin n'nota 1.

Imikino y'umunsi wa 3 n'uwa 4 biteganyijwe izaba umwaka utaha muri Kamena 2024.



Handball : Ikiye y'u Rwanda igiye kwitabira imikino y' Afurika bwa mbere

Taliki 16 Ugushyungo 2023 i Cairo mu Misiri habereye tombola y'uko amakipe azahura mu mikino y'igikombe cy' Afurika mu mukino wa Handball mu bagabo "Men's Handball African Cup of Nations 2024". Iyi mikino izabera mu Misiri kuva taliki 17 kugeza 27 Mutarama 2024.

Ikiye y'u Rwanda igiye kwitabira ku nshuro ya mbere iri mu itsinda A hamwe na Cap Vert, RDC na Zambia. Itsinda B ririmo Misiri, Guinea, Cameroun na Congo Brazzaville. Itsinda C ririmo Maroc, Algeria, Gabon na Libiya naho itsinda D rigizwe na Tunisia, Angola, Nigeria na Kenya.

Muri iri rushanwa rizaba ribaye ku nshuro ya 26, amakipe 5 ya mbere azabona itike yo kuzaserukira Afurika mu mikino y'igikombe cy'isi "IHF World Men's Handball Championship 2025" izabera muri Croatia, Denmark na Norway kuva taliki 09 kugeza 27 Mutarama 2025.

Ikiye izegukana igikombe kandi ni yo izaserukira Afurika mu mikino Olempike izabera i Paris mu Bufaransa kuba taliki 25 Nyakanga kugeza 11 Kanama 2024.



Nyagatare: Hatangijwe umwaka w'imikino mu mashuri

Taliki 18 Ugushyungo 2023 mu Karere ka Nyagatare hatangirijwe umwaka w'imikino mu mashuri wa 2023-2024.

Iki gikorwa cyatangijwe na siporo rusange nyuma hakinwa imikino itandukanye.

Muri uyu muhango hari abayobozi mu nzego zitandukanye zaba ziza siporo ndetse n'inzego bwite za Leta.

Iyi mikino yo mu mashuri ikinwa mu byiciro birimo abiga mu mashuri yisumbuye (batarengeje imyaka 20) ndetse n'abo mu mashuri abanza (batarengeje imyaka 15).

Imikino ihera ku rwego rw'Akarere, amashuri yitwaye neza ku rwego rw'igihugu mu mikino itandukanye akabona itike yo guhagararira u Rwanda mu mikino ihuza ibigo by'amashuri muri Afurika y'Iburasirazuba "FEASSA". Imikino iheruka ya 2023 yabereye mu Rwanda naho itaha ya 2024 izabera muri Uganda.



Sitting Volleyball : u Rwanda ku mwanya wa 7 mu bagore n' uwa 9 mu bagabo mu gikombe cy'Isi 2023

Kuva taliki 11 kugeza 18 Ugushyingo 2023 i Cairo mu Misiri habereye imikino y'igikombe cy'Isi mu mukino wa Volleyball mu bantu bafite ubumuga "World ParaVolley Sitting Volleyball World Cup 2023".

Iyi mikino y'igikombe cy'Isi yitabiriwe n'amakipe 13 mu bagabo n'andi 10 mu bagore.

Mu bagore, ikipe y'u Rwanda yari iri mu itsinda A hamwe na Misiri, China, Germany na Mongolia naho itsinda B ririmo Canada, Brazil, Slovenia, Ukraine na Netherlands.

Mu mikino 4 y'amajonjora ikipe y'u Rwanda yakinye, yatsinze 2 itsindwa indi 2. Iyi kipe yatsinze Mongolia amaseti 3-0 (25-11, 25-07 na 25-10) inatsinda Misiri amaseti 3-0 (25-06, 25-16 na 25-10). Yatsinzwe na Germany amaseti 3-0 (25-20, 25-19 na 25-22) inatsindwa kandi na China amaseti 3-0 (25-07, 25-06 na 25-11).

Muri ¼, ikipe y'u Rwanda yatsinzwe na Brazil amaseti 3-0 (25-15, 27-25 na 25-14).

Mu guhatanira imyanya (5-8), ikipe y'u Rwanda yatsinzwe na Ukraine amaseti 3-1 (18-25, 25-09, 25-19 na 25-23) nyuma itsinda Misiri mu guhatanira umwanya wa 7 ku maseti 3-0 (25-16, 25-17 na 25-14).

Ikipe ya China ni yo yegukanye igikombe itsinze Canada amaseti 3-1 (25-23, 25-16, 17-25 na 25-20).

Uko amakipe yakurikiranye



Mu cyiciro cy'abagabo

Mu bagabo, ikipe y'u Rwanda yari iri mu itsinda A hamwe na Misiri na Iraq. Itsinda B rigizwe na Iran, Japan na Algeria, itsinda C ririmo Brazil, China, India naho itsinda D ririmo Germany, Ukraine, France na Great Britain.

Mu mikino y'amajonjora mu itsinda, ikipe y'u Rwanda yatsinzwe na Iraq amaseti 3-2 (22-25, 25-16, 20-25, 26-24 na 15-13) inatsindwa na Misiri amaseti 3-0 (25-16, 25-17 na 25-18).

Mu guhatanira imyanya, ikipe y'u Rwanda yatsinze u Bufaransa amaseti 3-0 (25-11, 25-8 na 25-21), itsinda Algeria amaseti 3-0 (25-16, 25-19 na 25-16), itsinda Great Britain amaseti 3-0 (25-09, 25-17 na 25-11) inatsinda kandi India amaseti 3-0 (25-08, 25-14 na 25-19). Iyi kipe y'u Rwanda yasoreje ku mwanya wa 9.

Uko amakipe yakurikiranye





RWANDA
Olympic rings logo



commonwealth
games
RWANDA

Website: www.olympicrwanda.org

www.olympicrwanda.org/commonwealth

Email: cnosr@olympicrwanda.org |     @RwandaOlympic

Address: Remera–Hallmark Center Building KG 17 Ave